

03/09/2008 (Rabu)

Puspakom, SMART antara diminta beri penjelasan

Oleh WAN SYAMSUL AMLY WAN SEADEY

KUALA LUMPUR 2 Sept. - Jawatankuasa Kira-Kira Wang Negara (PAC) akan memanggil beberapa jabatan kerajaan termasuk Pusat Pemeriksaan Kenderaan Berkomputer (Puspakom) selepas Hari Raya Aidilfitri untuk mendapat penjelasan berhubung masalah audit.

Pengerusinya, Datuk Seri Azmi Khalid berkata, agensi-agensi tersebut adalah antara 123 agensi kerajaan yang menerima sijil audit berteguran dalam Laporan Ketua Audit Negara Tahun 2007 yang dikeluarkan baru-baru ini.

"Antara kementerian dan agensi kerajaan yang akan dipanggil ialah Kementerian Kewangan, Kementerian Pelajaran, Kementerian Kesihatan dan polis.



AZMI Khalid berbincang sesuatu dengan timbalannya, Dr. Tan Seng Giaw selepas mengadakan mesyuarat Jawatankuasa Kira-Kira Wang Negara mengenai Laporan Ketua Audit Negara 2008 di Bangunan Parlimen, semalam.

"Pihak yang terlibat dalam beberapa projek di bawah Kementerian Sumber Asli dan Alam Sekitar seperti Terowong Smart serta projek pengalihan air di Jinjang yang masih belum selesai akan turut diminta memberi keterangan," katanya.

Beliau bercakap pada sidang akhbar selepas mesyuarat PAC penggal pertama di Parlimen hari ini.

Azmi berkata, agensi peringkat Persekutuan yang berjaya mendapat tahap prestasi pengurusan kewangan yang sangat baik ialah Jabatan Perdana Menteri (JPM), Jabatan Perkhidmatan Awam, Unit Penyelarasan dan Pelaksanaan di JPM, Jabatan Tenaga Kerja Sarawak, Jabatan Peguam Negara dan Unit Pemodenan Tadbiran dan Perancangan Pengurusan Malaysia (MAMPU).

"Kesemuanya mendapat empat bintang iaitu tahap tertinggi yang membuktikan prestasi cemerlang sepanjang tahun.

"Agensi ini ialah antara 117 agensi yang mendapat sijil bersih atau sijil audit tanpa teguran untuk tahun lepas," ujarnya.

Azmi berkata, secara keseluruhannya prestasi agensi-agensi kerajaan masih berada pada tahap memuaskan.

Bagaimanapun beliau menyarankan supaya kakitangan jabatan audit dalaman di setiap kementerian ditambah bagi memastikan sebarang masalah dapat diselesaikan di peringkat agensi.



03/09/2008 (Rabu)

Nik Aziz persoal bagaimana kemajuan diukur

kota bharu 2 Sept. - Menteri Besar, Datuk Nik Abdul Aziz Nik Mat tidak senang dengan Laporan Ketua Audit Negara 2007 bahawa aktiviti jabatan dan agensi kerajaan negeri Kelantan bagi tahun lepas secara umumnya tidak menunjukkan kemajuan ketara.

Nik Aziz mempersoalkan bagaimana asas perkiraan tahap kemajuan itu diukur dan dibandingkan oleh Ketua Audit Negara.

"Maju atau tidak maju 'lagu' mana (bagaimana) perkiraan, kalau pegawai kerajaan Kelantan tidak rogol atau terlibat dengan salah guna kuasa, ini maju ke, ini kemajuan takrif orang Eropah, takrif orang Islam lain.

"Kita terima laporan itu, tetapi yang penting takrif maju itu sendiri perlu jelas, sebab kita ini bekas dijajah. Mereka bukan saja kaut keuntungan ekonomi, tetapi juga menindas serta meninggalkan budaya tidak elok kepada kita," katanya kepada pemberita di sini hari ini.

Beliau diminta mengulas Laporan Ketua Audit Negara yang menyebut aktiviti jabatan dan agensi kerajaan negeri Kelantan bagi 2007, secara umumnya tidak menunjukkan kemajuan ketara.

Seperti tahun sebelumnya, masalah membabitkan kelemahan perancangan, pelaksanaan dan pemantauan terus berlaku membabitkan agensi kerajaan negeri seperti Pejabat Tanah dan Galian (PTG), Yayasan Kelantan Darulnaim (Yakin) dan projek usaha sama Pembangunan Bandar Baru Tanah Merah.

Kelemahan yang dikesan seperti projek tidak mengikut jadual, lewat disiapkan dan pembinaan tidak berkualiti kerana pemaju gagal mengikut spesifikasi kontrak.

Dalam pada itu, ketika ditanya adakah kerajaan negeri Kelantan akan melakukan perubahan, Nik Aziz yang juga Mursyidul Am Pas berkata, pihaknya bersedia untuk memperbaiki semua kelemahan yang ada.

"Memang kita perbaiki selama-lamanya, tidak ada negeri yang tidak boleh baiki.

"Pelaksanaan kerajaan adalah berteraskan Islam dan memang usaha untuk perbaiki kelemahan sentiasa dilakukan," katanya.

BPR disaranteliti laporan Ketua Audit Negara

KUALA LUMPUR 2 Sept. - Gerakan Rakyat Anti Korupsi (Gerak) meminta supaya Badan Pencegah Rasuah (BPR) meneliti laporan Ketua Audit Negara bagi mengesan gejala rasuah dalam perbelanjaan kementerian, jabatan-jabatan kerajaan dan badan-badan berkanun.

Pengerusinya, Mohd. Nazree Mohd. Yunus berkata, pihaknya yakin laporan Ketua Audit Negara mampu membantu BPR mengesan dan menangani gejala rasuah yang wujud akibat penyalahgunaan kuasa dan pengurusan dana kewangan kerajaan.

"Gerak yakin laporan Ketua Audit Negara akan menjadi kurang efektif sekiranya laporan itu tidak dimanfaatkan dengan sebaik-baiknya oleh BPR bagi tujuan membasmi rasuah serta salah guna dana kerajaan jika terbukti ia berlaku.

"Oleh itu, Gerak mencadangkan agar BPR terus merujuk kepada Ketua Audit Negara sekiranya wujud unsur-unsur kecurigaan dalam penggunaan dana kerajaan oleh kementerian dan badan berkanun yang terlibat.

"Perkara ini perlu disiasat dalam usaha kita membasmi penyelewengan dan rasuah," katanya dalam satu kenyataan di sini hari ini.

Dalam pada itu, beliau berkata, Gerak juga akan terus memberikan sokongan kepada BPR sekiranya badan itu mampu mengambil tindakan terhadap penyelewengan dan rasuah yang berlaku dalam kementerian, badan berkanun dan kerajaan negeri.

Katanya, laporan Ketua Audit Negara amat penting dan menyumbang ke arah pembentukan ketelusan dalam pengurusan akaun serta kewangan negara.

45 projek ekopelancongan tidak berpotensi

Oleh SAIFUL HAIZAN HASAM

KUALA LUMPUR 1 Sept. - Sebanyak 45 daripada 60 kawasan projek ekopelancongan telah dikenal pasti tidak berada dalam senarai kawasan berpotensi seperti yang digariskan di bawah Pelan Ekopelancongan Kebangsaan.

Ketua Audit Negara, Tan Sri Ambrin Buang berkata, pihaknya juga mendapati tiada bukti 45 kawasan itu pernah menjalani sebarang kajian mengenai potensinya.

"Contoh projek yang bukan berada di kawasan yang disenaraikan dalam Pelan Ekopelancongan Kebangsaan ialah Projek Agro Pelancongan Kompleks Pertanian Bukit Temiang dan Projek Kemudahan Pelancongan di Rezab Perhilitan Wang Pinang, Mukim Kuala Perlis, masing-masing di Perlis.



Ambrin Buang

"Turut tidak tersenarai ialah Projek Peningkatan Kemudahan Taman Botanical, Melaka dan Projek Peningkatan Kemudahan Pelancongan di Pulau Tulai, Pahang," katanya dalam Laporan Ketua Audit Negara 2007.

Dalam perkembangan berkaitan, Ambrin berkata, Kementerian Pelancongan didapati tidak menubuhkan bahagian khusus untuk melaksanakan projek ekopelancongan.

Selain itu katanya, pihak kementerian juga tidak menetapkan kriteria rujukan bagi menilai permohonan projek pembangunan walaupun Pelan Ekopelancongan Kebangsaan telah mengesyorkannya.

"Pelan Ekopelancongan Kebangsaan telah menyediakan 25 garis panduan bagi semua pihak yang terlibat dengan perancangan dan pengurusan setiap jenis kawasan ekopelancongan.

"Garis panduan ini dapat memberi kefahaman yang jelas mengenai sesuatu kawasan ekopelancongan daripada segi keperluan perbincangan, amalan pengurusan, struktur pentadbiran dan sebagainya," katanya.

Beliau berkata, berdasarkan soal selidik yang diedarkan Jabatan Audit Negara kepada Unit Perancang Ekonomi Negeri (UPEN), majlis daerah dan badan-badan promosi pelancongan, pihaknya mendapati mereka secara umumnya kurang jelas mengenai konsep ekopelancongan.

Katanya, perkara itu berpunca daripada kurangnya promosi tentang konsep ekopelancongan dan dokumen berhubung dengan pelan tersebut termasuk garis panduannya tidak diedarkan untuk makluman dan rujukan pihak berkaitan.

Kemas tidak lantik pemaju masyarakat

KUALA LUMPUR 1 Sept. - Jawatan pemaju masyarakat yang belum diisi oleh Jabatan Kemajuan Masyarakat (Kemas) dikenal pasti menjadi punca 17 buah pusat sumber miliknya tidak dapat beroperasi.

Ketua Audit Negara, Tan Sri Ambrin Buang berkata, masalah itu menyebabkan hanya 10 daripada 27 Pusat Sumber Kemas yang telah siap dan diserahkan kepada pejabat Kemas negeri dapat dimanfaatkan masyarakat.

Beliau berkata, pihaknya juga tidak berpuas hati dengan cara pengurusan pusat sumber terbabit memandangkan kerajaan telah membelanjakan sebanyak RM33.98 juta bermula 2002 hingga 2006 untuk tujuan pembangunannya.

"Sebanyak 10 daripada 11 pusat sumber yang diaudit juga didapati berada dalam keadaan yang tidak memuaskan seperti keretakan pada dinding, siling bocor, ruang aktiviti dimasuki air, mendapan pada lantai, pagar runtuh dan kawasan sekeliling bangunan dipenuhi semak samun.

"Ia tidak dapat dibaiki atau diselenggara kerana ketiadaan peruntukan kewangan disediakan," katanya dalam Laporan Ketua Audit Negara 2007.

Dalam perkembangan berkaitan, beliau berkata, urusan perolehan buku dan peralatan bagi kegunaan pusat sumber didapati tidak dibuat dengan teratur.

Katanya, terdapat barangan yang dibeli masih belum digunakan dan disimpan dalam kotak kerana tidak sesuai atau ketiadaan rak untuk menyimpannya.

"Harga yang dibayar bagi beberapa barangan adalah terlalu tinggi berbanding dengan harga pasaran," katanya.

Sehubungan itu, beliau menyarankan Kemas supaya bertindak segera untuk mengisi jawatan yang diluluskan serta memohon peruntukan kewangan secukupnya daripada Kementerian Kewangan bagi tujuan penyelenggaraan bangunan.

Katanya, Kemas juga perlu mewujudkan pangkalan data khas untuk memudahkan kerja-kerja merekod dan capaian maklumat bagi memantau aset yang diperoleh.



01/09/2008 2:32pm (Isnin)

Pengurusan kewangan majoriti agensi kerajaan pada tahap baik - Ketua Audit Negara

Negara

KUALA LUMPUR 1 Sept. — Pengurusan kewangan majoriti agensi kerajaan di peringkat persekutuan dan negeri adalah baik, demikian rumusan Jabatan Audit Negara dalam Laporan Ketua Audit Negara Tahun 2007.

Menurut kenyataan Ketua Audit Negara hari ini, daripada 212 agensi yang diberi penilaian Indeks Akauntabiliti (IA), sebanyak 4.7 peratus mendapat penarafan sangat baik, 66.5 peratus di tahap baik manakala 28.7 peratus di tahap memuaskan.

Agensi di peringkat persekutuan yang berjaya mendapat tahap prestasi pengurusan kewangan yang sangat baik ialah Jabatan Perdana Menteri, Jabatan Perkhidmatan Awam, Unit Penyelarasan dan Pelaksanaan (Jabatan Perdana Menteri), Jabatan Tenaga Kerja Sarawak, Jabatan Peguam Negara dan Unit Pemodenan Tadbiran dan Perancangan Pengurusan Malaysia (MAMPU).

Badan berkanun persekutuan yang mempunyai prestasi pengurusan kewangan sangat baik pula ialah Bank Kerjasama Rakyat Malaysia Bhd dan Perbadanan Insurans Deposits Malaysia manakala agensi di peringkat negeri pula ialah Perbadanan Johor dan Jabatan Geosains & Mineral Pahang.

Mulai tahun 2007, Jabatan Audit Negara telah melaksanakan Sistem Penarafan Audit yang berasaskan kepada IA. Ia dilaksanakan untuk menilai sejauh mana pengurusan kewangan agensi telah mematuhi segala undang-undang dan peraturan kewangan kerajaan.

Aspek pengurusan kewangan yang diberi penilaian adalah seperti kawalan pengurusan operasi, kawalan bajet, kawalan terimaan, kawalan perbelanjaan, pengurusan kumpulan amanah, akaun amanah/deposit, pengurusan aset dan inventori, pengurusan pelaburan, pengurusan pinjaman dan penyata kewangan.

Menurut kenyataan itu, dengan melaksanakan penarafan IA itu, agensi diberitahu mengenai aspek pengurusan kewangan mereka yang perlu diperbaiki.

“Sekiranya ketua agensi melaksanakan langkah-langkah penambahbaikan mereka dengan penuh komitmen dan konsisten, prospek mereka mendapat penarafan lebih baik amatlah cerah,” menurut kenyataan itu.

Menerusi sistem penarafan IA itu, agensi kerajaan juga boleh menjadikan ia sebagai tanda aras semasa menilai kemajuan usaha penambahbaikan dalam pengurusan kewangan mereka dari semasa ke semasa.

Jabatan Audit Negara juga telah menyediakan buku bertajuk “Kecemerlangan Pengurusan Kewangan Dari Perspektif Jabatan Audit Negara,” dengan kerjasama Institut Tadbiran Awam Negara (INTAN) yang akan diedarkan kepada semua warga perkhidmatan awam yang terlibat dalam pengurusan kewangan.

Menurut kenyataan itu, Ketua Audit Negara telah mengeluarkan sijil audit tanpa teguran terhadap penyata kewangan 115 badan berkanun persekutuan, 44 badan berkanun negeri negeri dan 47 penyata kewangan pihak berkuasa tempatan.

Sijil audit berteguran pula telah dikeluarkan terhadap sembilan akaun badan berkanun persekutuan, tiga penyata kewangan badan berkanun negeri dan dua penyata kewangan pihak berkuasa tempatan.

Menurut kenyataan itu, penyediaan penyata kewangan bagi kerajaan persekutuan, kerajaan negeri dan badan berkanun persekutuan secara keseluruhannya adalah bertambah baik.

"Bagaimanapun, bagi penyata kewangan Badan Berkanun Negeri dan Pihak Berkuasa Tempatan masih terlalu awal untuk memberi sebarang pandangan mengenai kerana tidak semua penyata kewangan telah diserahkan untuk pengauditan," menurut kenyataan itu.



01/09/2008

Hutang kepada Kerajaan Pusat RM10.62 bilion

KUALA LUMPUR 31 Ogos - Hutang tertunggak yang gagal dibayar kepada Kerajaan Pusat pada tahun lalu mencecah RM10.62 bilion berbanding 10.04 bilion pada 2006 iaitu meningkat 5.8 peratus.

Ketua Audit Negara, Tan Sri Ambrin Buang berkata, syarikat merupakan yang paling besar mempunyai tunggakan sehingga mencecah RM3.9 bilion diikuti kerajaan negeri RM3.5 bilion.

Beliau berkata, badan berkanun pula berada di tangga yang ketiga apabila hutang tertunggaknya berjumlah RM2.4 bilion.

"Agensi lain yang terlibat adalah seperti pihak berkuasa tempatan (RM477.6 juta), perbadanan kemajuan negeri (RM139.7 juta), koperasi (RM15.8 juta) dan pelbagai agensi lain (RM164.32 juta)," katanya dalam *Laporan Ketua Audit Negara 2007*.

Ekoran isu tersebut, Ambrin dalam laporan itu berkata, Perbendaharaan perlu mengambil tindakan yang lebih tegas untuk mendapatkan kembali tunggakan bayaran balik pinjaman.

"Ia bagi membolehkan kerajaan menggunakan wang tersebut untuk tujuan pengurusan dan pembangunan yang lain serta memastikan kerajaan tidak menanggung kerugian," katanya.

Mengulas isu yang sama beliau berkata, kelewatan Jabatan Akauntan Negara menyediakan jadual bayaran balik menyebabkan peminjam tidak membuat bayaran balik pinjaman mereka.

Justeru, beliau berkata, pihak Perbendaharaan dan Jabatan Akauntan perlu mengatasi isu itu dengan mewujudkan satu mekanisme untuk memantau dan memastikan jadual bayaran balik dikeluarkan lebih awal.

"Tujuannya adalah untuk memastikan semua agensi yang berhutang dengan kerajaan Persekutuan dapat membayar balik pinjaman pada masa yang tepat dan seterusnya mengurangkan tunggakan bayaran balik pinjaman," katanya.

Dalam pada itu, Ambrin dalam laporan tersebut turut menyebut kesemua kerajaan negeri tidak menjelaskan sebahagian bayaran balik pinjaman mengikut jadual.

"Akibatnya jumlah tunggakan yang dicatatkan meningkat iaitu daripada RM2.9 bilion pada 2006 kepada RM3.5 bilion (2007). Ia merupakan peningkatan 18.2 peratus," ujarnya



01/09/2008

Senggara bangunan kerajaan perlu ditingkat

KUALA LUMPUR 31 Ogos - Jabatan Audit Negara mendapati tahap penyenggaraan bangunan-bangunan kerajaan di Putrajaya dan Kuala Lumpur secara umumnya harus dipertingkatkan dan ada antaranya perlu dibaiki segera.

Ketua Audit Negara, Tan Sri Ambrin Buang berkata, sehubungan itu, Jabatan Kerja Raya (JKR) telah diminta mengambil tindakan sewajarnya iaitu memastikan semua bangunan tersebut disenggara secara berjadual serta membaiki bangunan yang rosak.

Beliau berkata, ia bagi menjamin semua bangunan kerajaan tersebut berada dalam keadaan baik dan selamat digunakan.

"Jemaah Menteri semasa mesyuaratnya pada 9 Mei 2007 telah meminta Ketua Audit Negara mengetuai pasukan audit menjalankan pemeriksaan secara menyeluruh ke atas semua bangunan kerajaan di Putrajaya dan Kuala Lumpur.

"Ia bertujuan menentukan dan mengenal pasti punca kerosakan sama ada disebabkan oleh kelemahan reka bentuk, pembinaan atau penyenggaraan," katanya dalam *Laporan Ketua Audit Negara 2007*.

Pada 11 April tahun lalu, operasi Ibu Pejabat Imigresen di Putrajaya 'terhenti' apabila berlaku kebocoran paip air di tingkat tujuh, melimpah hingga ke tingkat bawah.

Kejadian yang dipercayai berlaku sejak pukul 2 pagi itu menyebabkan lebih 3,000 orang yang mahu berurusan di situ terpaksa diarahkan ke pejabat cawangan di Kajang, Shah Alam, Wangsa Maju, Kelana Jaya dan Subang.

Dan 17 hari selepas kejadian itu, bumbung dewan di Kementerian Pembangunan Usahawan dan Koperasi, Putrajaya runtuh selain berlaku keruntuhan siling di Kompleks Mahkamah baru di Jalan Duta pada bulan yang sama.

Ambrin dalam laporan itu berkata, pengauditan ke atas bangunan kerajaan itu melibatkan 155 bangunan iaitu 90 bangunan di Putrajaya dan 65 lagi di Kuala Lumpur.

"Pihak Jabatan Audit turut membuat pemeriksaan ke atas 120 ruang pejabat yang disewa di 48 bangunan di Kuala Lumpur," katanya.

Beliau berkata, proses pengauditan telah dibuat dengan kerjasama KLIA Consultancy Services Sdn. Bhd.



1/9/2008 (Isnin)

248 guru dikenakan surcaj kehilangan peralatan RM9.56j

Oleh amran mulup

KUALA LUMPUR 31 Ogos - Sebanyak 248 guru telah dikenakan bayaran surcaj berjumlah RM1.91 juta kerana kehilangan peralatan Program Pengajaran dan Pembelajaran Sains dan Matematik dalam Bahasa Inggeris (PPSMI) antara tahun 2005 dan 2007.

Mengikut audit 2007, surcaj itu dikenakan ekoran rekod Kementerian Pelajaran bagi tempoh 2005 hingga 2007 menunjukkan peralatan seperti komputer riba, komputer desktop, projektor LCD dan pencetak bernilai RM9.56 juta telah hilang di 812 sekolah.

Selain guru, 194 syarikat kawalan keselamatan dikenakan tindakan yang sama dan membuat bayaran gantian berjumlah RM7.85 juta ekoran kehilangan peralatan itu di sekolah.

Ketua Audit Negara, Tan Sri Ambrin Buang berkata, antara punca kehilangan peralatan PPSMI ialah apabila komputer riba yang dibawa balik ke rumah oleh guru telah dicuri atau hilang.

"Tindakan surcaj diambil oleh Jawatankuasa Penilaian dan Jawatankuasa Tatatertib kementerian bagi kes-kes kelalaian guru manakala bagi kehilangan di sekolah syarikat kawalan keselamatan dikenakan tindakan," katanya dalam Laporan Ketua Audit Negara 2007.

Mengikut laporan audit, pada 2005 sebanyak 680 komputer riba dan projektor LCD hilang di 274 sekolah, dengan kerugian dianggarkan bernilai RM4 juta.

Pada 2006, sejumlah 655 kehilangan komputer riba, projektor LCD, komputer desktop dan pencetak dilaporkan hilang di 295 sekolah dengan kerugian bernilai kira-kira RM2 juta.

Manakala pada 2007 sebanyak 490 kehilangan dilaporkan di 243 sekolah dan kerugian dianggarkan bernilai RM3 juta.

Mengulas lanjut Ambrin berkata, semakan audit mendapati telah ada laporan polis dibuat terhadap kehilangan peralatan PPSMI itu.

Beliau berkata, bagi kehilangan yang berlaku di 370 sekolah yang lain, pihak audit tidak dapat menentukan pihak yang bertanggungjawab kerana perkara itu masih dalam tindakan polis.

Menurutnya, bagi mengatasi masalah kehilangan komputer riba di sekolah-sekolah, pihak kementerian telah mengambil tindakan membekalkan sejumlah 18,029 komputer desktop.

Selain itu, katanya, kementerian mengambil keputusan mengurangkan bekalan komputer riba melalui perolehan di bawah Fasa IV dan V.